

**NINTH MIZORAM LEGISLATIVE ASSEMBLY  
(FOURTH SESSION CUM BUDGET SESSION)**

**LIST OF BUSINESS**

FOR FIFTH SITTING ON WEDNESDAY, THE 5<sup>th</sup> MARCH, 2025  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **PU LALDUHOMA**, Hon. Chief Minister to lay on the Table of the House a copy of “Economic Survey of Mizoram 2024 - 2025.”
3. **PU F. RODINGLIANA**, Minister to lay on the Table of the House a copy each of the Annual Reports of Mizoram Khadi and Village Industries Board for the years 2017-2018, 2018-2019, 2019-2020, 2020-2021, 2021-2022 and 2022-2023.

**PRESENTATION OF REPORTS**

4. **PU W. CHHUANAWMA** to present to the House the First Report of Committee on Estimates (2024-2026) on Aizawl-Thenzawl-Lunglei World Bank Road relating to Public Works Department.
5. **PU T. LALHLIMPUIA** to present to the House the Second Report on Actions Taken by the Government Against the Recommendations Contained in the First Report of the Committee on Petitions (2024-2025) relating to Environment, Forests and Climate Change Department.

**FINANCIAL BUSINESS**

6. Discussion and Voting on Supplementary Demand for Grants for the year 2024 – 2025.

**LEGISLATIVE BUSINESS**

*Bills for introduction, consideration and passing*

7. **PU LALDUHOMA**, Hon. Chief Minister to beg leave of the House to introduce “The Mizoram Appropriation (Supplementary Demand for Grants 2024-2025) Bill, 2025.”

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

8. **PU LALNGHINGLOVA HMAR**, Minister to beg leave of the House to introduce “The Mizoram Liquor (Prohibition) Amendment Bill, 2025,”

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

9. **PU VANLALHLANA**, Minister to beg leave of the House to introduce “The Mizoram (Pension for Members of the Defunct Mizo District Council and of the Defunct Pawi – Lakher Regional Council) (Amendment) Bill, 2025.”

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

VANLALTHANTLINGI  
Commissioner & Secretary

\*\*\*\*\*

**SPEAKER** : *Mi zawng zawng hnena i sawtna a lan theih nan chung thilah te chuan taima la, chungah chuan inhmang zo rawh.*

- I Timothea 4:5

### **QUESTIONS & ANSWERS**

*Starred Question No. 41: Sawhthing lei chungchang.*

*Zawhna Neitu: Pu C. Ngunlianbunga, Lawngtlai West Bialtu.*

**PU C. NGUNLIANCHUNGA:** Pu Speaker, Starred Question No. 41 chu hei hi a ni –

- a) Sawhthing hi sorkarin engtiangin nge lei a tum?
- b) Lei a tum dan kimchang min hrilh thei em?
- c) Sawhthing hi sorkarin grade a then tumna a nei em?
- d) Sawhthing hi chhungkaw khat atanga lei tur bithliah a awm dawn nge, kuthnathawktute tharchhuah zat ang ang sorkarin a lei zel dawn?

**SPEAKER** : A Chhang turin a changtu Minister Pu PC Vanlalruata.

**PU PC VANLALRUATA, MINISTER:** Pu Speaker, ka lawm e. A chhanna - Sawhthing leikhawmna atan sorkarin secondary collection centre 62 a siam a, heng centre-ah te hian auction a ni ang. Kg ah 50/- a tlin lohna chu support price hmangin kuthnathawktute hnenah pek a ni ang. Ka han sawi belh lawk ang a.

India ramah tunah hian sawhthing production a tam em avangin sawhthing rate hi a sang hlei thei lo a. Nitinin India ram State hrang hranga sawhthing rate hi marketing board te chuan a thlithlai reng a. Chutiang chuan, sawhthing rate a san theih tak loh avangin Mizoram ah pawh sawhthing rate a up hlei thei lo a. Tunah hian tlemin a up chho a, kg ah 33 – 35/- te a ni chho mek a. Chutiang a nih lai chuan, kan kuthnathawktuten sawhthing hralh an duh tawh si a, mi-harsa ve te-te te an lo ni a. Chutiang annih avang chuan February ni 20-ah sorkarin, ‘sawhthing secondary collection centre-ah a la dawn e’ kan ti a, kuthnathawktute kan thlamuan a. Chuvang chuan, Feb. ni 20 atang khan secondary collection centre 62-ah sawhthing chu kg-ah 50/- hisapin sorkar sumin kan han la phawt a ni a, chu chu kan lei dan a ni.

Sawhthing lei dan tur hi chi hniha buatsaih a ni a, Pakhatna chu - Collection centre-ah auction a ni ang a, kg ah 50/-a chhangtu an awm loh chuan, sorkarin kg ah 50/- tho in a lak sak ang. Hei hi, collection centre mumal zawka kalpui a nih theih nana bul tan chung te, price sang zawka nawr a nih theih beiseina te leh kan tharchhuah tam thut avanga buaina awm thei venna atana hmalakna a ni.

Pahnihna chu - Secondary collection centre-ah auction a ni ang a, kg ah ₹50/-a chhangtu an awm loh pawhin, a chhang huai ber hnenah pek a ni ang a. ₹50/- a tlin lohna zawng chu sorkarin support price a pe ang. Sorkarin sawhthing man a tum chin tur hi kuthnathawktute hnenah Direct Beneficiary Transfer hmanga pek tura ruahman a ni.

Heng collection centre te hi society hnuaiyah sumdawnna puitling kalpui thei tura thuum chaka, helai hmun atanga hralhchhuah sawhthing man hniam lutuk tur support price hmanga ven hi sorkar tum dan a ni. Tin, market ngelnghet zawk siam theihna tur a nih

beisei a ni bawk. Mizoram-ah hian regulated market kan la neih loh avangin thlathar hralh chhuah a buaithlak em em mai a. Kum eng emaw zat kal taah khan sawhthing hi khaw tam tak chuan an khaw level-ah auction te an lo kalpui tawh thin a, khaw 20 chuang laite chuan hetiang hian ruahmanna fel tak neiin auction te anmahni khuaa society in an lo kalpui thin a, an tifuh em em niin kan hria a. Chutiang deuha collection centre, tuna kan han ruahman te hi ‘Cluster Society’ kan ti a, khami area hrang hranga primary collection centre te atanga hruaitu inthlangin Cluster Society an in din a. Tichuan anni kha sawhthing leh thlai dang nakin zelah pawh an la buaipui turah ngai ila, khatianga mumal taka an lokal ve theihna turin ruahmanna siam a ni. Engnge kan an dawn chu kan la hre lova; bul kan tan chauh a, la harsa ve viau a. Kan la siamtha chho zel turah pawh ngai a ni.

Tunah chuan sawhthing grade then tumna a awm rih lo.

Sawhthing hi chhungkaw khat atanga lei tur bithliah a awm lo. Feb. Ni 20 - June 2025 chhunga collection centre-a sawhthing hralhtute chu support price pek tura ruahman a ni. March, Ni 1 khan ZPM-Legislature Party meeting kan nei a. June thla thleng marketing board in kan lo ruahman tawh hi, hetiang sawhthing kum dang anga hralh a chak tak loh avang hian, helai hi chu ngaihtuah that leh atan dah ila kan ti a. Chuvang chuan, June, 2025 thleng support price pek tura kan lo inruahmana kha helai hian a hun bituk awm tawh lovin, a hralh theih chhung chu support price sorkarin kan pe dawn a ni.

**SPEAKER** : Zawhbelhna chungchangah ruling kan nei thin a, a tirah ka sawi a. A zawhna neituin zawhna (a neih chuan) kan la ang a, a dang, ‘member dang pahnih hnen atangin kan la ang’ tih kha a ni a. Kan han bawhpelz zeuh zeuh thin a. ‘Zawhna hi in la tam lo deuh mah mah e; ruling dinglai anga kal mai a tha lo maw’ tih thurawn leh sawina a tam a. Chuvangin, tun atang chuan a zawhna neitu bakah member pahnih kan la ang a. Kha kha kan inhrethiam dawn nia.

Zawhbelhna zawt turin: -

1. Pu C. Ngunlianchunga (Zawhna neitu),
2. Pi Baryl Vanneihsang,
3. Pu Lalchhuanthanga.

**PU C. NGUNLIANCHUNGA:** Pu Speaker, Kuthnathawktute ZPM sorkarin an intiam ang ngeiin a kumkhatna atana sawhthing an han lei sak kha lawmawm ka ti a. Ka zawhbelhna chu –

i) Collection centre leh a khaw inkara a phurh man a kha tute chawi tur nge? Entirnan: ka bial, Bungtlang leh Diltlang ah SCC a awm a. Vathuampui te, Tuisentlang te, Chamdurtlang te leh a chhehelte tan chuan hla tak a ni a. Kg ah 50/- a lei tur a nih lai hian, a kal man ringawtah pawh 50/- kha an chawi a ngai a, an mangang khawp mai a. Khang collection centre kha tihbelh dan a awm em? A phurh man a kha tute nge tum ang? A dahbelh theih dan a awm em?

ii) Mizoram chungah sawhthing sawrna khawl kha bun a ni ta em? Serchhip MLA constituency a bun mai tura kan Chief Minister in sorkar thar lawmna Thenzawl Auditorium (Ni 21 Dec. 2023) ah, “nakum lamah chuan sawhthing herna khawl kan bun fel theih kan beisei” tih a sawi kha, beisei ang khan sawhthing herna khawl bun a ni ta em? Nge, kan Chief Minister zahawm tak, Ni 20 zana a in leng ni awm takin video clip a rawn siam hmuh tur a awm a; an lo bawl kual deuh mai mai nge? Hei, kumkhat a liam ta a;

Mizoram ah hian bun a ni ta em?

iii) Sawhthing herna khawl lo bun ta se, engtik atangin nge a her hna hi tan a nih ang?

iv) Sawhthing kg ah 80/-a lei ngam mai tur kan Chief Minister hnena sawitute khan engtikah nge an lei theih ang? Kha, a sawinaah khan, her hnu ah 80/-in an lei ngam thu an sawi a video clip ah kan hmu a, kha kha kut hnathawktute tan a beiseiawm em? Tunah India ramah sawhthing rate kg ah 33/- a nih thu te Minister atangin kan ngaithla a. Pu Speaker, khang te kha a tak ram a thleng thei dawn em?

v) Tin, kan Chief Minister zahawm takin ‘kan sorkar hotuten an buaipui thei dawn e’ a tih kha, Agriculture Department hian a hriatpui em? Hria ni se, an lo buaipui ngei em?

vi) Kan Minister zahawm tak chhanna ah khan, ‘market mumal an la nei lova, kan inbuatsaih chho zel a ni’ a tih bakah, ‘bawngpa thlun phelh phat ang kan ni ang; kan inring sa vek; kan thiam sa vek; kan inzir vek tawh e’ tih kha, he sorkar a lo dinna leh a inzawrhna kha a ni a. Tun kum khat chuang a kal tak hnuah pawh hian a la mumal lo hle nia sawi kha, kan Minister hian a hriatpui reng em? Ka lawm e.

**PI BARYL VANNEIHSANGI:** Pu Speaker, ka lawm e. A zawhna neituin a kaitawi bik lutuk lova, chuang chuan kei pawh min hrethiam la, ngenna ang reng deuh han sawi tel ka duh a.

Hei, sawhthing sawi hun hi kan lo nghakhlel em em a. Kan hriat theuh angin, sorkarin min duhsak a, a sample ah, a hma tawngah kan biala sawhthing an rawn la a ni a. A tha tam tak karah a thalote a lo awm a. Thil reng rengah a tha leh a thalo a awmin, a tha lo zawk hi a thawm ring zawk a ni zel a. Chuang chuan, wawiinniah keini pawhin zawhna tam tak ka dawng a.

Chutah chuan, kan Agriculture Minister zahawm tak hnenah hian tuna bul kan tanna, a khaw hmingte pawh kan han sawi lang tawh tho a, sawilan kha a pawtawh lo turah ka ngai a. Sailam leh Chamring ah hian sawhthing tha tam tak a awm a, tuna a palha kha chu a lo awm a ni mai a. Amaherawhchu, a dang a tha tam tak thawm chhuah tur kan nei a, henge hi khawngaihin priority ah rawn neiin, min rawn hmang leh sela, ‘lak chhunzawm hmasakah min rawn hmang leh sela’ tih kha ka ngenna a ni a.

Tin, ka bial chungah sawhthing tha tak tak nei khaw dang an la awm bawk a, chungte pawh chu kan la zel dawn em? Tuna khaw pahnih kan sawilan takte atang pawh khan lak chhunzawm zel a ni dawn em? Ka lawm e.

**PU LALCHHUANTHANGA:** Pu Speaker, ka lawm e. Ka zawhbelhna chu –

i) Sorkar kal tawhah support price pek a ni tawh em?

ii) Loneitute kawtkaiyah Sawhthing kha lei sak a ni tawh ngai em?

**SPEAKER** : A theih ang anga chhang turin a changtu Minister Pu PC Vanlalruata ilo sawm ang.

**PU PC VANLALRUATA, MINISTER:** Pu Speaker, ka lawm e. Member zahawm tak Pu C. Ngunlianchunga zawhnate han chhang hmasa dawn ta ila.

‘A market system a la mumal lo; inbuatsaih tha viau tawh ang khan insawi si’, tih kha, ka sawi laia kha chu, State zawng zawng chuan market-mandi tha tak mai an nei vek tawh a, APLM te an hmang tawh a. Keini Mizoram hian kan la hmang thei lo a, tunah hian kan

buaipui mek a; hman theih thuai pawh kan inbeisei a. Tunah hi chuan, Central sorkar zarzo theihna chance tha tak kan la nei thei lo a ni. Chuvang chuan, kan market system hrim hrima hi chu ‘a la mumal lo’ tih hi chu phat rual a ni lo a.

Tunah pawh hian ruahmanna kan han siam chho a, collection centre kan han ti deuh rum rum a. Loh theih lohin sorkar-thar a lo piang a, kan intiam tawh angin, ‘modified crop 4-ah hma kan la ang’ kan ti a. Chutiang a nih avang chuan sawhthing te, aieng te, hmarcha leh hmunphiah te chinna khaw hrang hrangah Primary Society 678 tunah hian sorkar hriatpuinain kan din tawh a ni. Chung society 678 te khaikhawm tur chuan secondary collection centre hi sawhthing bikah hmun 66, hmunphiah ah 62, hmun 8 te kah chu a danglam a danglam avangin ka sawisual mai thei a; tunah pawh Sakawrdai ah hmunphiah bik tan kan hawng thar leh dawn a ni. Chutiang chuan, primary society khaikhawm tur secondary collection centre kan ruahman ta a ni. Chutah chuan khang primary society te khan secondary collection centre, a cluster-a an sawhthing hralhna tur kha society leh society, anmahni khan an inbuaipui ve a ngai a ni. Chuvang chuan, PCC atanga SCC phurh man kha sorkarin a buaipui thei ta lo a ni. Anmahni society khan lo inthawhkhawma, pickup te hire-in, secondary collection centre ah anmahni sum sengin an phur lut ve thin a ni. Sorkarin sum tam tak tunah pawh hian kan seng tawh a, khang zawng zawng kha sorkarin kan tih chuan kan tlin lo a ni. Chuvang chuan, kan kuthnathawktute pawhin helai hi chu min hrethiam se kan duh khawp mai.

Tin, Chief Minister-in Ni 21.12.2023 ah Thenzawl hmunah, sawhthing herna khawl bun a nih tur thu a sawi kha thudik a ni a; tunah hian kan inbuatsaih mek a. Amaherawhchu, a processing hi chu a harsa a ni. Chief Minister lo betute kha ‘CO2 Productions’ an ti a. CO2 chu a tui lakchhuahna tura processing lam pang kha an tum a ni a. Amaherawhchu, entrepreneur te annih angin kan CM pawh an rawn dawr a, keini te pawh min rawn dawr a; anmahni sum ringawta titur chuan a crore tel project a nih ve avangin, rin aiin a awlsam lova, an rin ang khan a lo awlsam bik lo a ni. Keini pawhin tanpui theih te kan tum a, kawng te kan dap a. Tanpui turin sorkar pawh a inpeih viau rualin, anni lam pawh kha bank loan te lak a ngaih avangin an tum angin thil an tichak hlei thei lova. Hei hi chu ruahmanna kalpui mek a ni e. Heng bakah hian a slice-dry te, a finger-dry te ti turin tunah hian entrepreneur eng emaw zat an inbuatsaih mek a, sorkar pawhin an mamawha pui turin a inhawng hle a ni.

Chutiang chuan 80/-a lei ngam awm anga sawi te kha rawn tarlan a ni a, khangte pawh kha a dik a ni. Kan Chief Minister Mumbai inneihnaa sawm a nih tum khan Reliance hotute nen indawrin, hmalakna tur sawihawn a ni a. Anni chuan, “E, theih tawp kan lo chhuah ang a, kan indawr chhunzawm zel ang” an ti a, kan Horticulture Minister te leh kan Marketing Board Co-Chairman Dr. Malsawmzauva te Mumbai ah thlawk thlain, agreement tur te an zuk ruahman a. Amaherawhchu, sorkar inrawlh kha kan duh lutuk lo a, ‘loh theih lovah chuan sorkar kan inrawlh ang’ kan ti a. Amaherawhchu, a tam zawkah hi chuan company dang, private entrepreneur te hi rawlh luh hram hram kan tum a ni. Chutiang a nih avang chuan, an rawn order metric ton 10 chu, ‘i ti chhin ang u’ kan ti a, metric ton 10 kha kg ah 80/-in an la a ni. Chutianga ti tur chuan MZSLRM society hnuaiia Ropuiliani FPC te kha lo bawhzui turin kan ti a, Reliance Company te nen an sign a, tiang chuan a vawi khatna chu an thawm a. Nichina Pi Baryli zawhna kha a chhang kawp deuh mai ang a. Heng Ropuiliani FPC te hian Sailam leh Chamring te va dawrin, an khuua sawhthing kha an va lak sak niawm tak a ni a.

Anni hi Farmers' producer company an nih angin, share leh engkim company ang deuha kal an ni a, anni khan ruahmanna an lo siam a, metric ton 10 kha Kolkata ah an thawn thla a, chung zingah chuan a lo chhe deuchte pawh a awm a ni awm a, kha kha a viral ta a. A zavaiin a chhia a ni lo a, tunah hian Reliance Store, Kolkata te outlet 131 ah khuan mizo-sawhthing zawrh mek a nih thu report, Reliance atangin kan dawng a ni.

**PU LALCHHANDAMA RALTE, OPP. LEADER:** Pu Speaker, *Point of Clarification* - Facebook leh whatsapp-ah te a viral nasa a, 40% vel chhia anga sawi a ni a, Kolkata chu Mizoram House-a mizo thawktu kan neihna hmun te a ni a. Reliance ho, vai ho sawi kha dikah kan ngai reng em? Khang avanga kuthnathawktute rilru naa kan siam kha, tute nge a ti diklo tu; kuthnatawktute nge, a la chhawngtu Ropuiliani Farm te nge, MZSRLM nge, Reliance?

**PU PC VANLALRUATA, MINISTER:** Social media a thil viral reng reng hi inngahna tling berah ngaih fo tha lovin ka hria a. Chuvang chuan, heng sawhthing lei chungchangah pawh hian kan hlawhtlinna te, hlawhtling lo tur ang zawnga beihna pawh kan tawk nasa hle mai a. Helai pawh hi Marketing Board kut a nih chiah loh avangin ka zuk hre thui lem lo a. Amaherawhchu, farmers te rilru chhe vek anga lo viral a nih avangin keini pawh hrehawm kan ti a. Kan kuthnathawhtute hi hum tlat, chhan tlat kan tum a ni.

Chumi kawngah chuan helaia thil kal fuh lo pakhat a lo awm avang hian kan farmers te hi kan dem ngawt tur a ni lova, inzirtir chhoh mek kan ngai a ni. Farmers te hian regulated market-a luh dawn chuan sawhthing te pawh a grade fel taka thliar a tul tih hi kan kal zelna tur kawnga awm tel a ni tih hi he House kaltlang hian lo hria se ka duh a. Nidanga fimkhur nan pawh kan farmers leh a leitu turte pawhin lo hmang se kan duh hle a ni.

Tunah hian Sairang-a kan sawhthing lakkhawmte collection centre ah kan phur khawm a, auction-in a buyer ten an rawn lei mek a, metric ton 100 vel chu hralh chhuah tawh a ni a. Kan hralh chhuah reng reng kha inspection kan neih tir vek a. 'Heng hi in duh zawng a nih chuan la ula,' kan ti a, lehkha kan ziah tir vek a. 'A tha e; a quality a tha e' tih thlapin hming an sign a, chutiang chuan kan kalpui mek a ni. Chutiang chuan collection centre zawng zawngah pawh hian kalpui kan tum dawn a ni.

Pi Baryli zawhbelhna kha, Sailam leh Chamring te kha kan hnualsuat reng reng lova, sorkarin an thlavang kan hauh tlat zawk a ni. Nidangah pawh sawhthing an la neihte sorkar nen indawrna tha tak neia hralh turin duhsakna kan hlan a, sorkarin a pui dawn bawk a ni.

**PU C. NGUNLIANCHUNGA:** Pu Speaker, *Point of clarification:* A herna khawl te kha bun a la ni lo a. Helai hian kan Chief Minister thusawi chhiar chhuah tur a awm a, (Pu Speaker, i phalnain) – "Market te awm sa a ni ang a" a tih kha, chutiang hun chu awm thei turah ka'n ngai a. "A tih theih chuan, nakum lam atang chuan Zoram pawn lamah mite dawr ngai tawh lovin, kan ram chhungah sawhthing te kan hralh thei mai turah kan ngai" a tiha kha, mumang ram ang a va nih mai hmel ve maw le! Nikuma a sawi a ni tawh si a, hei, kumkhat a liam tawh a. Kum bithliah lai taka kha, 'hmalamah beiseina kan nei' tih te chu ni se.

**PU PC VANLALRUATA, MINISTER:** Kan sawi sual lova. Tunah hian kan hralh mek a, a chiang a. Min hriatpuitute inni a. Amaherawhchu, processing a lut tur hi chuan

thil awlsam a ni lova, a kum a ngai a. Industry te han buna ti tur chuan, kan ti chho mek a, hlawhtling turah kan in gai a. Tin, sorkar hmasa te pawh NLUP kha sorkar kum tawp lamah te an sem ve thei tawh kha a ni ve tho a. **(Pu C. Ngunlianchunga:** Pu Speaker, “keini chu kan danglam dawn; kan tha bik dawn; kan tha bik lo a nih chuan, Chief Minister nih pawh kan duh lo ang” tih hial a nih kha. Sorkar kal tawh kha sawi thin lo ula.)

Hei, keini chu Pathian leh sorkara kan thawhpuite zarah a kumkhatna atan kan lo intiam angin, sawhthing kg ah 50/-in kan han lei phawt chu a ni a, ti chho thei zel turah pawh kan inngai a ni.

Pu Chhuanthanga zawhna - sorkar kal tawhah support price pek chungchang kha, sorkar kal tawhte hi ka hre thui vak lova, sorkara kan tel ve loh avangin. Amaherawhchu, Pu Speaker, sawhthing hi kum 1998 atang khan Commission agent in kan lo lei ve tawh a, vai hnenah te; chutiang chuan kan han ti chho a. Kum 2003, MNF sorkar lai khan MAMCO kaltlangin sorkarin sawhthing a lei ve a. Chutah chuan ‘registered-buyer’ (mi 29 niin ka hria), MAMCO-ah registered buyers in kan inziaklut a. Chutiang chuan thingtlanga sawhthing kan lei khawm a, Bagha-ah kan zuk hralh thin a ni. Vairengte checkgate-ah khuan MAMCO in gate a nei a, chutah chuan in-voice min lo pe a, kan sawhthing phurh zat min lo zawt a, ‘quintal 30-50 te kan phur’ kan ti a, report kan pe thlap a. Tichuan, MAMCO khan sawhthing support price-ah 1/- min pe a, transportation cost-ah 1/- min pe bawh a. Sawhthing kg ah 2/- Zelin MAMCO kaltlangin sorkarin a registered buyers te kha a pe a. Chu chu ka hriat ve chhun a ni a, a bak chu sorkar kal tawhin support price kuthnathawktute an pek awm hi ka hre chiah lo.

Keini ZPM hi kan lo din tirh khan policy te kan han duang a. Sawhthing te, hmarcha te, aieng te, hmunphiah te hi khatih laia kuthnathawktuteharsatna a nih avangin, ‘hengah tal hian support price i pe ang u’ tiin, policy duangtu te khan kan rel a ni. Kei hi sawhthing-a lo sumdawng thang ka nih avangin, 50/- support price pek kha a sang ka ti a, ‘kg ah 40/- tal ni rawh se’ tia rawttu pawh ka ni a. Amaherawhchu, policy siam lai hian, ‘kuthnathawktute kan support ve tur alawm’ tiin, kg ah 50/- tia rel thluk a ni ta a. Kum 2017-a ruahman tawh kha kan kaltlang pui ta zel a ni. Support price pek hi a na kan ti lo a, sorkar ang pawhin. ‘50/- aia sanga an lei dawn chuan sorkar a inrawlh a ngai lovang’ tih kha kan lo rel dan a ni a.

Pu Speaker, he House zahawm taka report pek ka duh chu – nitin, zantinin India (Dubai thleng pawh a ni ang) Marketing Board hian price che vel hi kan vil reng a. Tunah hian sawhthing man a to chho a, April velah hi chuan kg ah 50/- te pawh a kai mai a rinawm a ni, a price trend kan han zir chhoh hian. Chuvangin, kan kuthnathawktute pawh lo hmanhmawh lo se, lo nghak hram se, a sawhthing to hun tur, nikum lamah te pawh kg ah 80/- te, 110/- thleng te a nih kha. Chuvangin, kumina sawhthing supply India ramah a tam avangin lo nghak hram hram turin society lamte pawh kan inzirtir mawlh mawlh a ni.

A zawhna pahnihna – ‘loneitute kawtkaiyah sawhthing lei a ni tawh em’ tih kha, kan sorkar chuan, (kan lo sawi tawh angin) zirtirna fel tak nei sain primary society te hnenah pawh, ‘secondary collection centre ah chauh lo chuan sawhthing lak a ni lo ang’ tia, primary society din kan tih lai atanga lo intiam tawh kan ni a. Chuvang chuan, kawtkaiyah lei hi kan sawi lawk a nih loh avangin leh, kan lo sawi tawh angin secondary collection centre ah kalpui chhoh mek a ni.

Tin, report pek leh lawk ka duh chu, (Pu Speaker, i remtih chuan), tunah hian kan sawhthing te hi collection centre kudam ah leh kan buffer-stock Sairang ah pawh a khat tan hle mai a. Tlema zawng chu auction-in kan hralh chhuak tawh a, buffer-stock atang hian metric ton 88 a kal tawh a, nitina load chhoh mek tur a ni. Tuna kan neih zawng zawng khu metric ton 1,997 a ni a, auction-in kan hralh chhuak mek a. Kan collection centre-ah hian quintal 1,04,300 vel a awm a, (a figure sawisual a hlauhawm a), nitin a pung ve zel a, auction pawh kalpui mek zel a ni. Saitual secondary collection centre-ah hian metric ton 75 hralh chhuah tawh a ni a, Khawzawl 73.3 metric ton, Lunglei 85.8 metric ton, Serchhip 180 metric ton leh, ka sawi tawh ang khan khulai kan buffer-stock atangin metric ton 88 phurh chhuah tawh a ni a. Auction ka kalpuiin nitinin hralh chhuah mek a ni a, kan kut hnathawktute pawh lo lungngai lo se.

Sawhthing hralhna kum dang angin a chak loh avanga lo lungngai tak takte pawh, lo lungngai lo se ka duh a. India ramah sawhthing kan neih ang ang te an hralh zo thawkhat niin kan hria a, chuvangin, sawhthing buyer-te pawhin Mizoram lam an rawn hawi tan ni te pawhin a lang a. Kut hnathawktute pawh he House zahawm tak kaltlang hian ka han thlamuan a ni e. Pu Speaker, ka lawm e.

**SPEAKER** : Tunah chuan, kan House Leader Pu Lalduhoma, sawi tur a neih ang te sawi turin ilo sawm ang.

**PU LALDUHOMA, CHIEF MINISTER:** Pu Speaker, ka lawm e. Tunhma kum rei tak kal tawh atang khan, “Pathian leh mipuite zarah kan lo sorkar ve anih chuan sawhthingte kan lei ang” tih hi kan lo aupui thin a. Amaherawhchu, ziaak pawhin, tawngka pawhin, ‘in kawtkaiah kan lei ang’ tih hi kan sawi ngai reng reng lo a; tu sorkar mahin an kawtkaia lei vek hi chu an tlin kan ring lo a. Chuvang chuan, kan sawi thin dan chu, “A collection centre kan siam ang a, chutah chuan sorkar rate angin kan leisak ang che u” tih kha a ni a. Kan intiam angin vawiinah hian kan kal a, kan intiam loh primary centre leh secondary collection centre inkar phurh man kha chu sorkar hian a pe thei lo a ni; pek sen ngaihna pawh a awm lo hrim hrim. Tunah hian kg-ah 50/-in kan lei mai a ni lo a, a ip ip khat hi 10/- a ni a, chu chu kan tum sak a, secondary collection centre - buffer-stock handling man kha kg-ah 3/- kan tum sak leh vek bawk a, SCC - buffer stock kal man zawng zawng kan tum sak leh vek bawk a ni. Khaw hla deuh atanga Sairang inkara kal man te chu a lo to em em a, kg 1-ah 70-80/- te sorkar chuan kan seng ta a ni. Chuti khawp chuan tunah hian kan sen hi a sang a.

Tunah chuan kan buffer stock godown a khat tawh a, kan secondary selection centre a khat tawh a, kan hralh thawl phawt loh chuan a dahna kan nei tawh lo a, a tah tawlin kan lei dawn a. Chu pawh chu, “lo hmanhmawh lo hram hram ula, lo ngaichang rawh u” tiin kan chah a. Mahse, kan farmers te an hmanhnawh a, duh aiin an lo cho chak a, secondary collection centre-a an rawn phurh thlen tur zat aia tam rawn phur te an awm a, kan in hnar thei si lo a, kan khat ta a ni. Kan khah tlat chuan lei zel tum mah ila a dahna kan neih tawh si loh avangin, “tlemin i chawl ang, kan han inhralh thawl ang e,” kan ti a. Tunah hian kan inhralh thawl mek a, dahna a ruah ve leh kan la leh zel mai dawn a. A lei hun chhung tur ‘June thla thleng’ tih kha pawhsei a ni tawh bawk a, hmanhmawh pawh a ngai lo a. Kan farmers ten kumina an thar zawng zawng hi chu kan lei vek dawn a, kan senso a tam emaw, a tlem emaw lam kan ngaihtuah lo, chu chu kan tum dan a ni.

Tin, a sawngbawlna hi Thenzawl ah khan a herna satliah ni lo, a tihrona pawh ni lo, a oil extraction kha din an tum a ni a, CO2 kha a processing-ah pawh a harsa zual a ni a, ram pawh pek diam an ni tawh a, ram tha tak, zau tak a thlawnin Neiloh VC ten an pe a ni, Thenzawl atanga hnaiteah sawn. Nichina member zahawm tak Pu C. Ngunlianchunga'n an chhiar chhuahah pawh khan "an tih theih chuan nakumah" tih kha a ni a, "an tih theih chuan" tih a ni a, an ti thei ta chiah lo a ni. A chhan chu, a process a lo rei ta a, sum te a lo ngai bawk a, a neuh neuhah khan, an rin aiin a lo harsa a. Kalpui mek zel a ni a, nakum hi chu a la awm zel dawn a.... (*interruption*)

**PU C. NGUNLIANCHUNGA:** Pu Speaker, khawngaihin kan House Leader sawi laiin. Tunah chuan kan House Leader a ni tawh a, 'a sawi hi Chief Minister sawi a ni' tih hi a hre tho ang a. Amaherawhchu, 'nakum' a tih lai kha 2023, ni 21 December a ni a, nakum a nih chuan, 2024 kha a kawka a ni. Tunah nakum ti turin, 2027 hi nakum a ni thei lo, Pu Speaker.

**PU PC VANLALRUATA, MINISTER:** Pu Speaker, kha chu kan sawi tawh kha maw... (**Pu C. Ngunlianchunga:** An lo ti thei lo a nih chuan, a dik mai a; "kan ti thei ta lo e, ka lo sawi advance deuh a ni" ti mai se) "An tih theih chuan" tih a ni a, a ziak kha a chiangin ka hria.

**DR. K. BEICHHUA:** *Question hour* atan hian darkar 1 pek a ni a, question pakhatat minute 35 kan cheng tlat mai. Kan House Leader pawh hian hrethiam se, demand sawi hun a la awm dawn a.

**PU LALDUHOMA, CHIEF MINISTER:** Ni e; chhan loh theih loin a zawttu lampang khan minrawn ti ve bawk si a.

"Kan danglam tur a ni, in ti a' an ti a; kan danglam reng tawh, tunah hian. Leilung pian tirh ata tun ang hian tumahin kan kut hnathawkte an ngaihsak ngai lo. Tunhma Mizoram sawhthing zawng zawng Bagha-pa Sunder Ali-a chauh lei theihna permit an pek hunlai te kha kan la hre vek a ni. A sirah a man to zawka lei duh pawh awm se la, an phal lo; nikum kha chen kha an monopolized a. Synod inkhawmpuia, "Synod-in sawhthing hralhna zawng rawh se," tih pass a ni a, an zuk zawng a, a hralhna a thatzia te an zuk hmu vek; mahse, Sunder Ali-a lo chuan a lei thei lo. Khang hun zawng zawng kha a lo ral ta a tunah chuan, khanglai kan au te kha, 'tunah chuan thu tisaah a lo chang ta a, kan danglam tawh a ni' tih hi ka sawi duh a.

'Reliance hnenah kg-ah 80/-in kan hralh dawn' kan tih kha, kan hralh der tawh a ni tunah hian. Reliance Company hian cheng 80/-in an rawn la a ni. Kolkata-ah khuan Reliance outlet hmun 131-ah kan sawhthing an zuar mek a; sawhthing chauh nilo, sapthei te leh kan rama thlai thar chi hrang hrangte an la rawn lei zel dawn a, India rama hotel lian zawng zawngah hian an supply a, 'Reliance Fresh' tih a ni. Vawikhatah tam tak an la lo a, mahse kumtluanin an duh reng a ni; kartin hian an duh a ni. An rate pawh a tha a, khawpui dangah pawh an kalpui mek a. Chu chauh ni lovin, Reliance Fresh hian kan ram chhungah hian a collection centre chenin din a tum a; lak khawma, a zawrhna pawh siam an tum a ni.

Sumdawn kan tan dawn chauh a, kan fimkhur tlan a tha a. Tunah hian primary collection centre (village) ah sawhthing rawn leia, kan secondary collection centre-a rawn hralh tumte

pawh an awm deuh niin kan hria a, fimkhur a ngai khawp mai. Khawi khua ah emaw kg ah 25/- bawr vela leia kan collection centre-a 50/-a rawn hralh leh kha an tum a ni. Chungte pawh chu ‘inveng ang u’ kan ti a, rinawmna nen he thil hi kan tih a ngai a. Rinawmlo kan lo awm hian min ti hmeh a. Dik tak chuan, Reliance Fresh te chu India rama reliable lutuk company an ni a, a len pawh an lian a, an rintlak a, dawt an sawi hi ka ring lo kei chuan. Mi rinawmlo te thlavang hi hauh lo ila, an lamah i tang lo ang u; dik turin inzirtir zawk ang u. Heng harsatna kan han tawh te pawh hi kan zavaiin sorkar leh a department te, kan farmer te pawhin fimkhurna atana kan hman pawh a tha viau ang.

**SPEAKER** : Aw le, a lawmawm e.

*Starred Question No. 42: Eklavya Model Residential School (EMRS) chungchang.*  
*Zawhna Neitu:* Pu Lalchhandama Ralte, Tuivawl Bialtu.

**PU LALCHHANDAMA RALTE, OPP. LEADER :** Pu Speaker, ka lawm e. Ka zawhna, Starred Question No. 42, Social Welfare, Tribal Affairs, Women and Child Development Department changtu Minister min chhan atan –

“Eklavya Model Residential School (EMRS), Sawleng khua, Darlawn RD Block hnuuia dah tura ruahman kha engtikah nge a sak hna tan theih a nih ang?” tih a ni e.

**SPEAKER** : A chhang turin a changtu Minister Pi Lalrinpui i lo sawm ang.

**PI LALRINPUII, MINISTER:** Pu Speaker, ka lawm e. Pu Speaker, hei, sorkarin Chapchar Kut urlawk nan Mizo-zia tilang thei tura inthum turin sorkar hnathawkte a sawmna angin, vawiina ka inthumna hi kei pawh, Mara lama kan unaute’n an puan an hman thin, Centenary Puan ka inbel a ni.

He House zahawm taka kan Opp. Leader Pu Lalchhandama Ralte zawhna ka chhanna chu hetiang hi a ni –

“Eklavy Model Residential School (EMRS). Sawleng khua, Darlawn RD Block hnuuia dah tura ruahman hi DPR siam hna tan tawh a ni a, approval hmuh ve leh a sak hna tan tum a ni” tih a ni e.

**SPEAKER** : Zawhbelhna zawt turin:

1. Pu Lalchhandama Ralte (Zawhna neitu),
2. Lt. Col. Clement Lalhmingthanga,
3. Pu K. Hramo.

**PU LALCHHANDAMA RALTE, OPP. LEADER:** Pu Speaker, ka zawhbelhna chu:

- i) ‘DPR siam’ tih kha, rin aiin a rei ta viau mai a. Hei hi kum 2021-2022-a tih tawh Covid avanga kan tih puitlin theih tak loh kha a ni a. DPR hi a thar kan siam leh em ni? A contractor tur nia inhria te pawhin a hmun te an lo han en thuak thuak tawh bawk si a; kha lai kha kan Minister khan han sawi fiah sela.
- ii) Tin, EMRS School tan khawtlangin ram zau tak an pe a. Hei school hi tan theih anih hunah thawktu Group C & D te an lak hunah a khawtlang mite duhsak theih a ni ang em?
- iii) EMRS School hi class engzat thleng tur nge? Zirlaite tan eng facilities te nge a thlawna an dawn theih?

**LT. COL. CLEMENT LALHMINGTHANGA:** Pu Speaker, Ka zawhbelhna chu –

i) EMRS hi JNV school te ang khan, Mizoram tan hian limit a awm em? Pu Speaker, ka han sawi chiang lawk ang a.

Mizoram hi district 8 kan nih lai khan, JNV school kha khang district 8 ah khan a awm vek a. Tunah chuan district 11 kan lo ni ta a, pathumna a awm belh a ngai niin a lang a. Tichuan, Champhai (ka bial) lamah khian (ka han sawi chhan pakhat chu), Khawzawl hi Champhai District chhungah a awm a, tunah chuan Khawzawl chu district hran a lo ni ta a. Tichuan, Champhai District tana JNV kha Khawzawl-ah a awm ta a ni. Khawzawl District a lo pian khan, Khawzawl ah a bei ta tlat a. Tichuan, tunah hian Champhai District tan JNV a awm ta lova, chu chu ‘Champhai District hian kan mamawh a ni’, tih kha ka han sawi lang nghal duh bawk a.

ii) Chutih rual chuan, Eklavya School (EMRS) hi district tinah semzai a ni nge? EMRS hi Mizoram State tan hian a population a zira dah nge, engtianga semzai nge?

iii) Tin, khawi hmun hmunah te nge he school hi din tura earmark a nih? Hmun engzatah nge?

**PU K. HRAMO :** Pu Speaker, ka zawhbelhna chu –

i) EMRS, Tipa hi repair emaw, renovate emaw tumna a awm em?

Hei hi ka rawn zawhna chhan chu - a awmna hi tlangchhip a ni a, thli leh ruah a tam a. Tin, an rangva chih hi a bathlar pawh awm lovin, a liang khuh chauha chih a ni a. Chuvang chuan, fur lai phei chuan tui a luh nasat avanga naupang awmte khawngaih thlak dan chu! Veilamin nihliap an khum a, dinglamin lehkha an ziak a, an khup hnuailam tuiah an chiah a ni. Khatiang khan lehkha thiam ngaihna a awm lova, an khawngaih thlak takzet a. Chuvangin, a chung rangva chih thata renovate tumna a awm em?

ii) Tin, he school hi Residential School tih ni siin, teacher-quarters pawh an nei lova. Teacher 5-6 vel chu awmna tur pawh nei lovin, school room pakhatatah an mu tlar dul a. Nulate an ni a, an tan safety a awm lo a ni. Chuvangin, Tipa EMRS tan hian staff-quarters sak belh tumna a awm em? A awm lo a nih pawhin, min sak sak thei ang em?

**SPEAKER :** Aw le, a chhang turin a changtu Minister i lo sawm ang.

**PI LALRINPUII, MINISTER:** Pu Speaker, zawhna neitu Pu Chhantea zawhbelhna kha a hmasa berin ka han chhang ang a.

Keini kan sorkarna hma khan TICL khan NEST kutah hei hi a pe a, tender pawh an chhuah niin, a chhang pawh an awm a ni.

Chutih lai chuan (vanduai thlak takin, kan ti dawn nge) ministry a lo inthlak a, Tribal Affairs Minister thar kan nei ta a. Chulai chance chu lain kan Chief Minister zahawm tak Pu Lalduhawma'n DO letter te ziaikin, hei hi Mizoram sorkar hnenah min pe turin kan zuk dil ta a. Tichuan, chu Chief Minister DO letter chu ngaipawimawh em emin, Mizoram sorkarah min rawn pe ta a ni. Mizoram sorkara min pek ve leh hian by- nomination in ZIDCO ah EMRS School sak hna kha kan pe ta vek a. Tichuan, mobilisation advance pawh eng emaw zat min rawn pe tawh a, chumi hmang chuan DPR siam mek a ni a, an peih chho ve zel a. Eng emaw zat an tih tawh report pawh an rawn pe zel a, an peih thuai pawh ka ring a ni.

Tin, thawktute lak chungchang hi keini pawhin kan worry ber a ni a. Tunah hian thuthang

ka hriat danah chuan, EMRS School zawng zawng hi centralise tawh tur a ni a, Northeast pawh hi North East Region-in a awm ang a, chutah chuan Society kan neih ang te pawh hi, Guwahati ah a office hmun awmin a thawktu lak zawng zawng pawh centralise tur niin kan hria a. Heta Member awm ve, Pu Nirupam Chakma, pawh vawi tamtak zuk biain, DO letter te kan ziak a. Thawktu lak chungchangah hian eng emaw chen localise min lak sak turin kan ziak tawh thin a ni.

Tin, class hi eng thleng nge an zir theih, tih hi, pawl 12 thleng zir an awm tawh a. Tuna kan hawn thar panga ho ah hi chuan pawl 8 thleng an zir a, chu chu tuna kan awm dan a ni a.

Pu Clement zawhna, JNV te angin State tan limit a awm em, tih kha – a awm chiah lova, tunah pawh hian kan inkalpawlh nasa em em a. EMRS School hi a bik takin minority area-ah hian an hlut em em a. Khulai Chawngte ah pheih chuan Chakma te, Bru te an tam a, Lunglei ah pawh sawn a tam ber anni a, Mizote hian ngaihhlutna chang kan hriat loh avangin minority te hi a tam ber anni a, an lut nasa em em a ni.

Tin, Siaha bial lam ka va fan khan EMRS School that zia nasa takin public ah awareness ka nei a. Siaha District ah chuan nasa takin an rawn bawh ta a. Sawlai No-aoh-tlah-a kan School thar pawh an len loh nasat avangin, Tlangnuam ah te kan dah a, a thawl thawl na ah kan indah a. Tun dinhmunah chuan a block emaw, a constituency ang zawng emaw-a tih tumna kha a awm lem lo a ni.

Tin, Pu K. Hrahmo, MLA zahawm takin a zawhna, Tihpa hi repair emaw, siam tumna emaw a awm em, tih kha - hei hi keima bengah chuan a lo la thleng miah lo a, a zia lo ka ti hle mai a. Engpawh nise, kan Secretary leh Director te pawh vawiinah hian ka bulah an thu vek a, anniin an lo chhihchhiah ang a. Khatianga School naupangte an lo awm kha a pawl kan ti a, a hma thei ang berin kan lo en ang.

Tin, Teacher quarters sak belh tumna kha, tunah pawh hian quarters sak belhna tur hi hmun then thenah chuan min rawn pe a. Hengte pawh hi proposal ah kan lo siam leh dawn nia. Pu Speaker, ka lawm e.

**SPEAKER** : A dawtah kan kal ang a.

*Starred Question No. 43: Hnahlan football ground chungchang.*

*Zawhna Neitu:* Pu H. Ginzalala, Champhai North Bialtu.

**PU H. GINZALALA:** Pu Speaker, ka lawm e. Sports & Youth Services Department changtu Minister zahawmtakin min chhan atana ka zawhna chu –

“Hnahlan Football Ground-ah hian dum a awm a, fur a lo thlen pheih chuan hman hleih theih a ni lo thin a. He ground hi tun aia tha zawkin min siam sak thei ang em?” tih a ni.

**SPEAKER** : Chhang turin, a changtu Minister Pu Lalnghinglova Hmar ilo sawm ang.

**PU LALNGHINGLOVA HMAR, MINISTER:** Pu Speaker,  
Hnahlan Football Ground hi tha zawka siam a nih theih nan theihtawp chhuah kan tum ang.

**SPEAKER** : Zawhbelhna zawt turin: -

1. Pu H. Ginzalala (Zawhna neitu),
2. Er. H. Lalzirliana,
3. Pu V. Malsawmtluanga.

**PU H. GINZALALA:** Pu Speaker, ka lawm e. Ka bial chhungah hian Sports infrastructure hi kan la nei chau khawp mai a. A bik takin volleyball court leh ho te te chu a ni nanging, khaw tin deuhthaw hian kan mamawh a ni. Hei hi kan Minister zahawmtak hian pawisa kan neih dan azirin min ngaihtuah sak thei ang em?

**PU H. LALZIRLIANA:** Pu Speaker, ka lawm e. Sports & Youth Services Department changtu Minister zahawmtak chhana tan ka zawhbelhna chu –

- i) Mamit Multipurpose Indoor Stadium tunah sak mek hi engtikah nge hei hi zawh fel theih a nih ang? Engnge hna hmabak la awm? Tun dinhmunah engnge a dinhmun min hrilh thei em?
- ii) District Sports Complex PMVJK hnuaiia kan kalpui mek zawh fel tawh – Futsal Ground te, Tennis Court te leh Volleyball Court te peih felna hi rei deuh tawh mai a ni a. Heng hi engtikah nge hawn theih a nih ang? Hawn loh chuan a lo rawih zel ang tih kha a hlauhawm a. A then he project ken tel leh a ruala tih la zawh fel chiah loh chung a mipuite'n an hman mek khu formal taka han hawn a tha lawm ni?

**PU V. MALSAWMTLUANGA:** Pu Speaker, ka lawm e. Sports & Youth Services Department changtu Minister zahawm tak Pu Lalnghinglova Hmar min chhana tana ka zawhbelhna chu –

- i) Sports & Youth Services hnuaiia football zirna te tihchangtlun tumna a awm em?
- ii) Lunglei Sports & Youth Services Academy hnuaiia naupangte hma lam hun hi eng angin nge sorkar in a buaipui? Ruahmanna a neihte min hrilh thei em?

**SPEAKER** : Zawhbelhnate chhang turin, a changtu Minister Pu Lalnghinglova Hmar ilo sawm ang.

**PU LALNGHINGLOVA HMAR, MINISTER:** Pu Speaker, Pu H. Ginzalala zawhna kha – Champhai North ah chang lo pawh Volleyball Court te, Football Ground te leh infiamna hmunhna dilna hi thahnem tak sorkarin a dawng a. A zavaiin lehkha ang phei chuan 500 chuang kan kawl tawh a ni. Tichuan, zawi zawiin, a theih ang angin hma kan la chho det det dawn a. Chung zingah chuan Champhai North Bial pawh a theih angin telh kan lo tum dawn nia.

Pu Speaker, Pu H. Lalzirliana, Mamit Bialtu zawhna – Mamit-a Multipurpose Indoor Stadium sak mek khu a sak pawh a tha thawkhat hle a. Khu khu a ziakah chuan April 12, 2025 a zawh tura tih a ni a. Tunah hianin kan zo hman chiah lo deuh mai thei a, sum pawh kan pe chhuak tha hle a. Tunah hianin ₹979,66,158/- a sakna atan pek chhuah a ni tawh nghe nghe a, a physical achievement pawh a tha thawkhat hle a. A hun takah kan hawng hman lo deuh a nih pawhin, hma chu kan sawn chho zel a ni.

A zawhna pakhatna kha - Mamit District ah hian Sports infrastructure lama hmalakna sorkar hmasa khan thahnem tak a nei a. A then sak lai, a then sak zawh tawh, a then la zawh loh deuhte kha a awm a; a then hawn, a then hawn lohte kha a ni a. Tun tuma District

Sports Complex a sawi pawh kha a dik khawp mai a. A then khu chu hman tawh te a ni a, then la zawh mumal chiah lohte a ni bawk si a. Chuvang chuan, a remchan dan angin Mamit DC kha lo enkawl lailawk turin kan han ti phawt a. A hawna kha, official-in kan la hawng lo deuh a ni. Engpawh nise, Pu Speaker, ‘a tul angin kan lo enzui ang e’ tih kha, House kaltlang hian a bialtu MLA, Pu H. Lalzirliana kha ka tiam a ni e. Kan lo enzui dawn nia tih kha.

Tichuan, Pu V. Malsawmtluanga zawhna kha – Sorkar hian Football Academy 2 – Saidan, Kolasib leh Pu Malsawmtluanga Bial, Lunglei ah a nei a. Naupang tha tak tak, Mizoram hmun hrang hrang atanga naupang tha thlankhawmte an awm a. Seat 25 ni thina kha, tunah hian a training laite an buai thin deuh e kan ti a, a pahnih hian 30 ah kan han tilian ve ve a.

Tichuan, partner tur hi kan zawng mek a, min rawn dawr te pawh an awm a. A pahnih hian kan duh si a. Pakhat chauh duh te chu an awm a, kan la final lo a. Tin, chu mi piah lamah chuan ISL (Indian Super League) Football Club pakhat pawh hian min rawn dawr a, partnership zawngin. Amaherawh chu, anni nen chauha kan inthlun zawm khan kan player te hmun danga an kal duh khan an buai palh kan hlau si a. Chu pawh chu kan la final lo a.

Pu Speaker, kan ruahman danah chuan, tunah hian kum 17 hnuai lamte Kolasib Saidan-ah an awm a. Tichuan, an han graduate khan, Lunglei lamah kan han la thla a. Coach ten kal zel tura a tha china an ngaih kha chu kum 19 hnuai lam a ni a. Tunah hian Mizoram Premier League an khel nghe nghe a. Tichuan, chuta tanga an graduate chuan a thiam leh thate chu professional-a lut tawh tura ngaih an ni a. Chutiang tur chuan inthumthat kan tum a. Kan ruahmanna kal mekah chuan, reliable partner kan neih chuan sorkar sum tihek lo zawka thui tak kal thei tura tih kan tum a. Indawrna a kal mek a, a hming te pawh hi han puan a chakawm a. Amaherawh chu, a ziaka sign engmah a la awm loh avangin, pakhat chauh hi an duh a. Keiniin Under 17 leh Under 19 te la ve ve tura kan duh si avangin, kan la innawr mek a ni. Pu Speaker, kha kha ka chhan thiam dan a ni e.

**SPEAKER** : A lawmawm e.

*Starred Question No. 44: Mizoram Sports Empowering chungchang.*

*Zawhna Neitu:* Pu Jeje Lalpekhlua, South Tuipui Bialtu.

**PU JEJE LALPEKHLUA:** Pu Speaker, ka lawm e. Sports & Youth Services Department changtu Minister Pu Lalnghinglova Hmar chhana tana ka zawhna chu –

- a) Sorkar Flagship Scheme Bana-Kaih (Hand-holding) hnuai Empowering Mizoram Sports hian eng chin nge a huam dawn?
- b) Thingtlang atangin beisei theih a ni em?

**SPEAKER** : Chhang turin a changtu Minister Pu Lalnghinglova Hmar ilo sawm ang.

**PU LALNGHINGLOVA HMAR, MINISTER:** Pu Speaker, a chhanna a ka luh hmain, Sorkar Flagship Programme ‘Bana-Kaih’ hnuai hianin infiammite hmasawna tur, sports lama naupang zawkte tihchangtlunna tur, kum 8 - 15 ten training mumal tak an neiha, Talent Identification Programme Mizoram pum huap duangin, a hmingah ‘Empowering Mizoram Sports’ tiin kan han dah a. Hei hi January ni 14 khan Chief

Minister-in a hawng a ni.

A chhanna ah khan kan han lut nghal ang a.

- a) Sorkar Flagship Scheme – Bana-kaih (Hand-holding) hnuai Empowering Mizoram Sports hian Mizoram pum a huam ang.
- b) Thingtlang atang pawhin beisei theih a ni e.

Tunah hian ruahmanna kalpui mek a ni a. Kan ruahman lawk dan chuan, Pu Speaker, Mizoram chhung mai ni lo, pawnlam mite nena in tie-up (inthlunzawm) in, anniin training min pein, kan coach-te training an pe ang a. Technical assistant te min han pe ang a, technical adviser-ah pawh an mithiamte kan ruai ang a. Tichuan, chu mite nen chuan kan coach-te an intuainnum hnuah Talent Identification Programme nei turin Mizoram khaw tam zawk, thingtlang atang pawha dil theih turin

**SPEAKER** : Khawngaihin. Zawhna & Chhanna hun a zo a. Kan Minister hi kan chhan zawh law law tir dawn em niang? (House-in a remti a.) Aw le, chhang zo law law rawh le.

**PU LALNGHINGLOVA HMAR, MINISTER:** Chutiang tur chuan ruahman niin, Public-Private Partnership Mode-a kalpui tur a ni a. Sorkarin sum peka keimahni mi leh sa va tirh ringawt lo deuh khan, khawtlang an lo tang ve ang a. Kan coach-te tan an thlen-in leh thildang mamawhte anniin an lo ngaihtuah ang a. Khawtlang nena tang hovin, a dil duh tena an dil theih turin tunah hian ruahmanna siam a ni. Kan launch tawh a; amaherawh chu, trainers training te leh a technical lam kha kan han inbun fel ang a.

Hei, application – mobile apps te hi siam mek a ni a. Chung atang te chuan a dilna te pawh awlsam zawkin; lang tlang takin, ‘khawiah nge kan kal tawh; khawi chin nge kan cover tawh; naupang engzatin nge training nei tawh’ tihte pawh Pu Speaker, a hriat theih dawn a. Tin, heng atan hian State Bank of India chuan CSR atangin sports equipment neihna tur ₹20 lakhs minrawn pe tawh nghe nghe a. Khatiang khan partner hran kan zawng zel ang a, CSR kaltlang te leh thildang atang tein. He EMS hi sorkar sum mai ni lova tihlen tumin ruahmanna kan nei mek a, bul pawh zawi zawiin kan tan chho mek a ni. Ka lawm e.

### **LAYING OF PAPERS**

**SPEAKER** : Aw le, tunah chuan, Laying of Papers ah kan kal ang a.

Heng Member-te hian an chanpuala theuha Reports te House Zahawm tak dawhkanah anrawn lay a -

1. Pu Lalduhoma, Chief Minister - “The Economic Survey of Mizoram, 2024-2025”.
2. Pu F. Rodingliana, Minister for P & E Deptt. to - “The Annual Reports of Mizoram Khadi and Village Industries Board for the years 2017-2018, 2018-2019, 2019-2020, 2020-2021, 2021-2022 leh 2022-2023”.

### **PRESENTATION OF REPORTS**

**SPEAKER** : Le, copy han sem rawh u le. Le, tunah chuan Presentation of Reports-ah kan kal ang a. A hmasa berin Pu W. Chhuanawma, Member zahawm tak leh Chairman, Committee on Estimates-in ‘The First Report of Committee on Estimates (2024-2026) on Aizawl-Thenzawl-Lunglei World Bank Road relating to Public Works

Department' House-ahrawn present sela.

1. Pu W. Chhuanawma, Chairman, Committee on Estimates - "The First Report on Aizawl-Thenzawl-Lunglei World Bank Road relating to Public Works Department".
2. Pu T. Lalhlimpuia, Chairman, Committee on Petitions - "The Second Report on Actions Taken by the Government Against the Recommendations contained in the First Report of the Committee on Petitions (2024-2025) relating to Environment, Forests & Climate Change Department".

**SPEAKER** : A copy kan sem kha kan changkim em aw? (Memberte'n an changkim a.) A lawmawm e. Tunah chuan Financial Business-ah kan kal ang a.

### **FINANCIAL BUSINESS**

**SPEAKER** : "Discussion and Voting on Supplementary Demand for Grants for the Year 2024-2025"-ah kan kal ang a. Bulletin pawh nimirah anrawn sem a, in lo hmu tawhin ka ring a. Chief Minister zahawmtak, Pu Lalduhoma Supplementary Demand for Grants for the Year 2024-2025 chu House-a submit turin i lo sawm ang u.

**PU LALDUHOMA, CHIEF MINISTER:** Pu Speaker, Supplementary Demand for Grants for the Year 2024-2025 chu he House zahawm takah hian karawn submit e.

**SPEAKER** : Supplementary Demand hi Budget Session-ah hian sawi ho a ni lo tlangpui thin a, nikum lamah Supplementary Demand hi 'sawi ho kan duh em?' tiin kan inzawt a, sawi duh kan awm lem lo kha a ni a. Amaherawh chu, memberten hriatthiam loh emaw hrilhfiyah duh bik kan neih chuan chu zawhna chu siam a rem turah ngai ta ila. Member zingah sawi duh kan awm em? Han zawt duh emaw, hriatthiam duh nei kan awm chuan i sawm ang. Member zahawmtak Pu C. Ngunlianbunga ilo sawm ang.

**PU C. NGUNLIANCHUNGA:** Pu Speaker kan ngaihthlak tak ang khan, Supplementary Demand hi sawiho a ni lem ngai lova. Amaherawhchu, kan House leader, helama vei lama a thut lai khan, sawi ho lova cheng tam tak kan vote lo leh hriat loha liam thin hi, "hetiang hi chuan kan financial management hi a that theih ka ring lo" a ti a. Vawiiinah pawh hian sawiho ila a tha lawm maw ni le? Hei sawiho tur hi a tam a. 24<sup>th</sup> February, 2020-ah khan kan House Leader zahawmtak hian ₹3,398 lakh Supplementary Demand arawn pharh khan sawiho loha liam kha a uiawm a ti thin a.

Tun tumah hian, Revenue leh Capital expenditure hi ₹35,12,33,000.47/- a ni a. Chuvang chuan, tlema zawng chu sawi a tha lawm maw ni le, ka ti a Pu Speaker. Ka sawi thei em? (**Speaker:** A sawi theih a. Nikum lam khan sawina hun kan inpe a. Amaherawh chu, 'sawi kan awm lo e' tih thu ka han sawi mai a ni a.) Pu Speaker, ka lawm e.

A pakhatna ah chuan, hei, Legislative Assembly Major Head 7610, Loan to Government Servants tih hi, MLA-te kan housing loan leh car loan-te niin a lang a. Hei hi budget siam hma khan GPC khan loan amount tur te leh MLA ten loan kan lak theih tur ang kha ruahman a ni a, kha kha budget-a GPC-in a siama kha a lo dah lo reng nge Tun Supplementary Demand-arawn langah hian housing loan ah ₹300 lakh a ni a, car loan ah ₹75 lakh a lo lang a. Hei hi GPC-in a pass tawh chuan budget-ah khan lang mai awm tak a nih laiin, a lang lo laia hi min hrilhfiyah thei se kan Finance Minister khan.

Tin, Demand No. 3-ah khan, kan sorkar mek, Adviser to Chief Minister sawisel tam ber khan Adviser to Chief Minister kan ngah ta ber em aw, tih tur a ni a. Helai Demand No. 3 – Major Head 2013, Council of Ministers hnuai ah hian ‘Purchase of vehicle, outsourcing for favour of Advisers to Chief Minister and Vice Chairman MNRC - ₹26,60,000/- lakh’ tih a ni a. Heng te pawh hi ruahmanna, sum inremchen kum kan tihah khan heng lai te hi kan han dah chho a.

Tin, Chief Minister Media Cell equipment lei nan hian cheng ₹20 lakh a ni a. Helaia ka han sawi duh ber chu Demand No. 3, Major Head 2052 – Secretariat General Service tih hnuai ah hian ‘A sum of ₹100 lakh is for salaries’ tih hi khawia tan nge an hman ang aw; tute ho hlawh tur nge?

Tin, Demand No. 9, Major Head 4047, CO & Other Physical Services tih hnuai ah hian ‘an amount of ₹352 lakhs for a payment of one-time settlement against the refinance loan availed by ZIDCO’ tih a ni a. ZIDCO khan loan hi a lo pe leh nge nia, enga tan nge ₹350 lakh hi hman a nih?

Tin, Major Head 7615, Miscellaneous Loan tih hnuai ah hian ‘₹352 lakh’ tih ZIDCO ah bawh a awm leh a, kha kha enga tan nge, tih laia kha min han hrilhfiah se.

Tin, Demand No. 10 (phek 29), Major Head 2051, Mizoram Public Service Commission (MPSC) tih hnuai ah hian ₹223 lakh leh, Sacred Service expenditure hnuai ah hian ₹83 lakh tih a ni leh a. Helaiah hian ka sawi ve thina chu, budget kan siam hian revenue expenditure leh capital expenditure hi, hei tun tuma kan GSDP te pawh kan Chief Minister khan ‘figure dik tak kan hman avangin a hniam a ni’ tih a sawi khan, tun hma zawng zawnga kan finance minister kal tawhte khan a figure dik lo hlin emaw ni le budget te kha an lo pharh le, ka ti a ni.

*Entirnan:* Salary (hlawh) tur te chu Revenue Expenditure head a awm awm tak a nih a; hetah hian mipui hi kan bum deuh em, ka ti a. A hlawh lama revenue expenditure tam ta lutuk leh capital expenditure tlem lutuk kha; he sorkar hian hnathawhna tur sum a nei lo tih hliah khuh nan, a hlawh lamah hian daih lovin sorkar-hnathawhkte hi an sorkar department-ah hian kan siam sak ber niin a lang a.

Hei, Supplementary Demand an rawn regularize leh ta a, kha inthupa kha a tawpa sawilan thin a nih loh avangin, a rawn chhilh khat leh mai thin a. Hetah pawh hian, Demand No. 11, Major Head 2052 - Secretariat General Service hnuai ah hian Payment of additional funds for salaries (hlawh indaih lohna) tih ah hian ₹604,86,000 lakh kha kan va pek belh ni awm takin a lang a. A hnuai ah hian ‘Office expenses, Repair and Maintenance ₹246,55,000 lakh’ a ti leh a. Major Head 2052 - ₹250 lakh tih ah khan note ah a lang a, ‘reprovision fund for several purpose’ tih kha engne a awmzia sawifiah a thain ka hria.

A tawp lamah chuan, Pu Speaker, District Council lamah chuan hlawh indaihlohna a nasat tehlu nen, pek belh an ni lova, PMJVK atana SMS tur District Council & Minority Affairs, District Council tak tak lam nilovin, a department-ah khan pek belh a awm nual mai a.

Demand No. 49 - Public Debt-ah hian Major Head 2049, Interest of Payment ah hian ‘₹247.47 lakh is required for payment of final interest due to late release of 15<sup>th</sup> Finance

Commission held grant 2021-2022' tih a ni a. A pahnihna ah chuan - '₹1,894 lakh hi required for payment of interest on delay in transferred of Central share of fund to SNA' tih a ni a. A hnuaiah, 'a sum of ₹622 lakh, to govt. payment interest state compulsory afforestation fund, 2023-2024' tih kha a ni a, central sorkarin pawisa min pek, department-a kan pek tlai vanga pawisa kan chawite nge a nih, tih kan Finance Minister khan min hrilfiah bawk se. Pu Speaker, ka lawm e.

**SPEAKER** : Sawi duh dang kan awm em? Aw le, Health Minister zahawm tak Pi Lalrinpuii kan sawm ang a. Hei, hunbi siam deuh thain ka hria a. mi pakhatin duh tawka sawi kha a awm thei a, min 5 emaw 10 emaw te kan inpe mai dawn em ni ang?

**PU LALCHHANDAMA RALTE, OPP. LEADER:** Pu Speaker, kha ti lo deuh khan, kan House kal dan pangngai deuhin rawtna ka rawn nei duh deuh a. Han sawi vak hun hi i hawng dawn a nih chuan, min la rawn sawm dawn tho a. Kan House Leader thusawi, kum 50 chuang kan House-in kan practice tawh te a awm a, kan kalphung te; chungte chu rawn propose tum deuh ka ni a.

**SPEAKER** : House ngaihndan engnge le? kan House Leader ngaihndan ilo ngaithla ang.

**PU LALDUHOMA, CHIEF MINISTER:** Kan *List of Business* kan en chuan, 'Discussion & Voting' tih a chuang kuau a. Tin, India Consitution kan en pawhin discuss tur a ni a. Mizoram ah chuan kan namnul zel a, kan discuss ngai lova. Hun kaltawh lamah khan discuss kan ngen thin a, phal kan ni ngai lova. Nikum atang khan a sorkar lamin 'kalphung tharin i kal ang u. Member-ten discuss an duh phawt chuan, kan in hawng e' kan ti ta a. Supplementary Demand copy pawh hi, kan List of Business ah khan Dak-ah nikumah pawh dah a ni a, nizan ah pawh dah a ni ta a. Nidangah chuan, House-ah a chawpchilhin min pe thin a ni. Kan memberte'n lo inbuatsaiha sawi in duh takin tih a ni. Sorkar lam chu kan inhawng a, 'sawi vak a ngai lo e' kan ti a nih pawhin a tha tho a. Eng pawh nise, sawiho chu 'House duh dan dan kan rem ti e', ka tihna mai a ni e. Discuss in duh chuan kan in hawng e. A ngai vak lo kan tih pawhin, tha kan ti tho.

**PU C. NGUNLIANCHUNGA:** Pu Speaker, Demand for Grant Bu hi a hmian min pe ziah; nizana min peka kha chu a phek te chauh a ni. A abstract chu min pe vek; a bu hi advance in min pe vek. Hei chu kumtin dan a ni. Speaker-in a rawn sawifiah theih ka ring a; a copy chu hun dangah chuan pek a ni ngai lo.

**SPEAKER** : Kan sawifiah dawn ang a. Tunhmain sawi a ni vak ngai lova; kan Opposition Leader sawi kha a dik a. Tun hmian lo kalpui tawh thin a ni a, Bulletin Part II No. 85 pawh hi tunhmain sem a ni ngai lo a, member-te hnenah a chawpchilha pek a ni thin a. Supplementary Bu erawh chu a hmian budget present ni khan sem a ni thin a, kan member zahawm tak Pu C. Ngunlianchunga sawi kha a dik a, kan House Leader sawi pawh a dik tho a ni. 'Discuss ang u' tih leh 'Discuss lovin kan kalphung anga khan kal mai a tha lo maw' tih, ngaihndan phir deuh a awm a. 'House-in kan ngaihndan i sawi ang u' tih leh, 'kan tih thin angin sawi ho lovin hei chu pass tho tho tur a ni a' kan ti zawk nge kan buk dawn nia.

‘Sawihlo lovin, kan tih thin angin; kan Chief Minister Finance-in a sawi chu a tha tawk e kan ti mai’ ti lam ban phar ila.

**PU LALCHHANDAMA RALTE, OPP. LEADER:** Pu Speaker, ban phar ngawt lo deuh khan, he thil hi constitution-a kan duty a nih avangin, hetia kan sawi zawk hian kan propose turah ka ngai deuh a. Memberte’n kan han zawha kha House Leader-in an chhang ang a, hei hi Parliament-ah pawh a ni ang a. India ram state dang zawng zawngah pawh Supplementary Demand hi a kalphungah sawihlo lovin, BE tih hun lai, sorkar kum kal laiah sorkar sum siam rem ngai lai te Voted ve tho a nih avanga siam felna kha a ni mai a, han in charge vak vakna tur kha a ni lo a. Kan House decorum lama kan neih kha i kalpui mai ang u hmiang. Article 205 khan discuss a ti a, discuss chiah lova kha chen House ina a lo practice, India Parliament-ah pawh a ni vek a. Zawhna leh a pawimawh bak chu hetiang discussion hi a awm ngai loh a avangin, member-te zalenna rap bet chuang lovin, a duh ten hriatfiah loh an neih te zawhfiah hun an neih bakah chuan. Hmannia i ho ngeiin BAC kan thu a, BAC te pawhin hei hi kan practice thin a nih avangin, inzawhfiah ngai te in zawt ila, a bak chu ‘Govt. Business i la ang u’ kan ti tlang tawh kha a ni a. Kan thusawia kan din hi he House zahawmna atan pawh a tha lo maw le?

**SPEAKER :** A lawmawm e. Kan thu a inhmu ve ve e. Kan member-te zawhfiah duh leh hriatfiah duh kan neih chuan kan zawt thei em em tho a; discuss vak leh in charge theihna vak a awm chuang lova. Thil kal tawh, hman tawhna -supplementary demand kha a ni mai a, member-ten hriatfiah duh leh hriatchian duh kan nei a nih chuan, la ila. Kan tih thin ang khan kan Finance Minister kan wind-up tir mai dawn nia.

Kha Member zahawm tak Pu C. Ngunlianchunga khan a hriat duhte kha a han tarlang a, a bak nei kan awm em? A awm lemlo a nih chuan, kan CM zahawm tak Pu Lalduhoma kan sawm ang a, sawifiah ngaite sawifiaha, House pass pui han dil turin ilo sawm ang.

**PU LALDUHOMA, CHIEF MINISTER:** Pu Speaker, a hmasaa in Member zahawm tak Pu Nguna zawhna kha - Kan MLA te housing loan leh car loan te kha budget ah inkhungleman lo em ni; engatinge Supplementary ah a lo luh? a ti a. GPC thut kha a tlai deuh avangin budget ah kan khung hman lo a ni. Budget hi Session awmhma deuh fe ah hian final a lo ngai thin a. Tin, engzatin nge dil dawn tih pawh kha a hriat theih loh a. Chuvang chuan, a chiah chiah ang khan thil tih a harsa a.

Tin, Demand No. 3 - Outsources of Vehicle tih chung chang kha, hei vehicle entitle chin an lo awm a, chu chu sorkarin vehicle a pe thei dawn nge, dawn lo tih kha hriat lawk a ni lo a, anmahni zalennaah kan dah a. “Outsource in duh zawk em, nangmah ni motor pawh in hmang thei a?” kan ti a, outsources an duh zawk kha chuan, sorkar khan kan tum sak mai a. Chuvang chuan, khang kha thil hriat lawk loh a nih avangin, a tul ang khan pek chhuah a ni ta a ni.

Tin, CM office Media Cell hi a lo rawih khawp mai a, equipment tha, camera tha pawh an lo nei reng reng lo mai a. ‘Hetiang ringawt chu a ni lo e’, kan ti a. Heng Chapchar Kut nikhua ah te bangla ah thla la turin an lo kal a, a department ami chahchawp a ngai a, an tan a buaithlak em em mai a. Khatiang thil te kha a nih tawh lohna turin, ‘tlemin in thuan tha deuh teh ang’ kan ti a ni.

Tin, Demand No. 9 - ZIDCO loan kha, tunhma atanga loan an lo lak kha an lo rul theilo a ni. Tih ngaihna a awm lova, vawikhat kan han rullh sak a, kan la chhan chhuak zo lova; kan rullh sak leh a ni. Tichuan, tunah pawh hian ba an la nei a, an la in clear zo lova. Amaherawh chu, engtin-tin emaw kan ti ang a an in clear thei mai kan beisei a. Tin, heta thawk thei tur pawh hian bank lama Mizo thawk senior ber, Managing Director turin kan chah chhuak a, theih tawp kan chhuah a, kan kal tluan theih tawh te pawh kan beisei a ni.

Tin, salary hi revenue hnuaiia la te, capital hnuaiia la te an awm a, tunhma anga plan leh non-plan te, salary te a hranpa a awm tak loh avangin heng hi an inchawhpawlh loh thei loh a. Tin, re-provision chung chang kha, reprovision hi a ngai fo a ni. A chhan chu, Finance ah sum a lo lut ta a, entirnan: kan hand-holding sum te chu Finance ah a lut phawt mai a ni; khata tang khan, a implement tak tak tur chuan planning ah suan pheia, re-provise kha a ngai ta a. Chuta tangin planning pawh khan a thawk tak taktu, a department-ah a hlan chhawn ve leh te a lo ngai ta a. Khatiang khan a sum ngaia kha a khawihtu hnenah a kal a ngai a.

Tin, non-works departmernt ten eng eng emaw building te sak tur an lo nei a, PWD ah transfer te a lo ngai a. Khatiang khan a tira budget-a kan pass ang ngau ngau khan a kal thei tawh lova, chumi kual vel te chu re-provision ngai kha a lo awm thin a. Tin, DC & MA hnuaiia late payment tih kha, 2021-2022 inkara 15<sup>th</sup> Finance commission in Healthcare Grant Mizoram sorkar a peka kha, khatih lai sorkar khan a hunah a pe thei ta lova. Tichuan, a late payment hremna (penal payment) kha an chawi ta thin a. Sorkar hmasa in hremna a tawh man kha kan sorkarah hian kan rullh sak a ni. Chutiang chiahin, central atanga CSS lo kal te hi ‘SNA ah ni chuti chhungin pek tur; in pek loh chuan penal interest inchawi ang; in la pek loh leh zel chuan, kan refund ang’ tih te a lo ni ta a ni. IFMIS te kan han hmanng chhoha sorkar khan a hunah a lo pek theih loh avangin, afforestation fund te pawh kha a ni tho a, chung chu a hremna kan chawi a ni ber mai.

Pu Speaker, khatiang khan Supplementary Demand hi chu tun tuma kan pass tura pawh hi, kan pass hnu ah a aia tam dawn kha kan nei leh dawn a, kan dawn tam poh leh Supplementary Demand kha a tam ve leh mai a. Tin, kan pass khan a daihlo te a lo awm ve a, hman belh ngai, khuarel chhiatna leh eng-eng emaw thil lo thleng unforseen kha a lo awm ve a. Khang te leh kan sawi ang khan a budget head siam ngaite kha a lo awm thin a ni.

Chubakah chuan, kumina kan supplementary titamtu chu, PHE chauh hi kan sawi ang a. PP Enterprise Mission Veng hnenah hian 2018 – 2019 chhova material an supply-na man kha crore 7.80 kan rul a ni; a rei tawh khawp mai. Tin, Pu KT Thanga & Sons Chaltlang bill crore 9.38 pawh kan rullh sak leh a, (a bu-a a lan vek kha). Tin, Gangawal Engineering Construction ah pawh hian crore 9.37 bill pending lo tang kha kan rul a ni. Chutiangin energy bill tang, PHE in an lo bat crore 43.42 kha kan pe a ni. Khatiang zawng zawng kha an ba a, a zia lo khawp mai a. ‘Rawn in clear rawh u’ kan ti a, a tirah min rawn hrilh mai si lova, anmahniin an hre lo nge ni. Department tinte hnenah, ‘pending bill in neih zawng zawng rawn theh lut rawh u’ kan ti a; sorkhar thar chuan kan leiba dinhmun hriat kan duh a. Chutah pawh chuan department thenkhat an rawn theh lut thei lova, a bik takin he department pakhat chauh, PHE ah ringawt pawh kan clear zo tawh em aw kan tih pawhin, a lo lut leh thin a, kha khan kan sum dinhmun a tibuai em em a ni.

Chungte chu sum hmuh belh bakah Supplementary Demand-ah dah a ngai ta thin a ni.

Tichuan Pu Speaker, he Supplementary Demand for Grant for the year 2024-2025 - crore 3476, 21,50,000 hi he House hian min pass pui turin ka rawn ngen e.

**SPEAKER** : Aw le, Chief Minister zahawm takin, Supplementary Demand for grants for the year 2024-2025, voted amount crore 3476,21,50,000 chu House pawmpui turin a rawn dil a. Remti apiangin ‘remti’ ti rawh u le. Remtilo kan awm chuan, ‘remti’ lo ti ula. (House-in pass a remti a) A lawmawm e.

Aw le, Supplementary Demand for Grant for the year 2024-2025 chu House-in lungrual takin a pass ta a ni.

Tuna kan passed tak Supplementary Demand for Grant for the year 2024-2025 kan hman theihna tur bill kan ngaituah a la ngai a, CM zahawm tak Pu Lalduhoma, The Mizoram Appropriation Supplementary for Grant for the year Bill 2024-2025 chu House-ah introduce phalna dil turin ilo sawm ang u.

**PU LALDUHOMA, CHIEF MINISTER:** Pu Speaker i phalna leh he House zahawm tak remtihain, Supplementary Demand for Grant 2024-2025 hi he House zahawm takah hian ka rawn submit e.

**SPEAKER** : Han introduce nghal la.

**PU LALDUHOMA, CHIEF MINISTER:** Pu Speaker, i phalna leh he House rem tihain, Supplementary Demand for Grants 2024-2025 hi he House-ah hian ka rawn introduce e.

**SPEAKER** : Kan Chief Minister zahawm tak kan sawm leh ang a. Chumi hma chuan, a copy kha han sem rawh u le, member te hnenah.  
(A copy sem a ni a...)

Chief Minister zahawm takin, The Mizoram Appropriation Supplementary Demand for Grants, 2024-2025 Bill, 2025, House-a introduce tak chu a rawn move a, pass dil nghal turin i lo sawm ang u.

**PU LALDUHOMA, CHIEF MINISTER:** Pu Speaker, he House remtihna tello hian sorkar in cheng khat mah a hmang thieng lova, amaherawhchu kan rem tih a, kan lo pass tawh hnu ah tih belh ngai Supplementary Demands te tam tak a lo awm leh a. Khatiang danglam a lo awm apiang a Session koh a, han pass tir ziah kha thil harsa a nih avangin kum tawp ah a hlawmin ti hian kan rawn pu lut thin a ni a. Tun a Supplementary Demand kan pass tak chiah hman phalna, a chabi kha a ni mai heihi chu. Chuvangin, The Mizoram Appropriation Supplementary Demand for Grants, 2024-2025 Bill, 2025 hi he House zahawm tak hian min pass sak ka rawn dil e.

**SPEAKER** : Appropriation Bill hi kan sawi ho ngai lo a, Chief Minister zahawm takin pass a rawn dil nghal baw k a, kan buk nghal mai ang a.

“The Mizoram Appropriation Supplementary Demand for Grants 2024-2025 Bill, 2025” hi pass remti apiangin, ‘remti’ ti ula, remti lo kan awm chuan ‘remti lo’ ti ula. (House-in pass a remti a.)

Aw le, “The Mizoram Appropriation Supplementary Demand for Grants 2024-2025 Bill, 2025” voted amount ₹34,76,71,50,000/- leh charge amount ₹36,11,97,000/-, a belh khawmin, ₹35,12,38,47,000/- hman theihna tur bill, “The Mizoram Appropriation Supplementary Demand for Grants 2024-2025 Bill, 2025” chu House-in lungrual takin a pass ta a ni. (**Pu Lalduhoma, Chief Minister:** Pu Speaker, ka lawm e.)

### **LEGISLATIVE BUSINESS**

Aw le, tunah chuan *Legislative Business* ah kan kal ang a. Kan *List of Business* ah khan kan hmu ang a, vawiina sawiho tura han chhawpchuaha kha, “The Mizoram Liquor (Prohibition) Amendment Bill, 2025” leh “The Mizoram (Pension for Members of the Defunct Mizo District Council and of the Defunct Pawi – Lakher Regional Council) (Amendment) Bill, 2025” te a ni a.

Tukin zing khan ka chamber-ah Opp. Leader te, BJP Legislature Party Leader te leh INC leader te an rawn leng a. Tuna “The Mizoram Liquor (Prohibition) Amendment Bill, 2025” amended a hi nizan khan semchhuah a ni a. Hei hi “Memberte tan inzirna hun leh han inpuahchahna hun te awm deuh hlek se kan va duh em” tiin, an rawn ngen a, a awm ka ti a. Amaherawhchu, ‘kan Speaker chu luh chilh ila, a ti leh mai ang’ tih ang erawh kha chu an rilru ah an awm bik lo turah ngai ta ila.

Tichuan kan House Leader leh kan Parliamentary Affairs Minister pawh ka rawn a; “A, a ni tak alawm; nidang remchangah tun Session chhungah si, ni 2-3 tal tla sela a tha a lawm” min tihpui a. Chuvang chuan, he bill vawiina LoB a rawn lang kha vawiinah kan sawi dawn lova, a pahnhna zawkah khan kan kal dawn a ni.

“The Mizoram (Pension for Members of the Defunct Mizo District Council and of the Defunct Pawi – Lakher Regional Council) (Amendment) Bill, 2025” hi a bill neitu Pu Vanlalhlana, Minister zahawm takin House-ah introduce phalna rawn dil turin ilo sawm ang u.

**PU VANLALHLANA, MINISTER:** Pu, Speaker, Governor zahawm tak leh i remtihna, “The Mizoram (Pension for Members of the Defunct Mizo District Council and of the Defunct Pawi - Lakher Regional Council) (Amendment) Bill, 2025” chu he House ah hian introduce phalna ka rawn dil e.

**SPEAKER** : Aw le, bill neitu zahawm takin House ah introduce phalna a rawn dil a. Kan phal sak em? (House-in a phalsak a.) Kan phal sak chuan, tunah han introduce sela, sawi ho tura rawn move nghal bawh turin i lo sawm ang u.

**PU VANLALHLANA, MINISTER:** Pu Speaker, “The Mizoram (Pension for Members of the Defunct Mizo District Council and of the Defunct Pawi – Lakher Regional Council) Act, 1994” amendment tur chu tiang hian ka han move nghal mai ang –

He Act hi amend a nih hnun ber chu kum sarh kal ta kha ni tawh a. Mizo District Council leh Pawi Lakher Regional Council awm laia Council Member pension la mek leh, an chungte family pension la an la awm a. February, 2025 khan pensioner mi 8 awmin, thla khata senso chu ₹2,38,811 a ni a. Tin, family pensioner mi 35 in an hmu a, thla khatah pension an lak hi ₹4,49,043 a ni. Tihian family pensioner te leh pensioner zawng zawng hi mi 43 anni a, thla khat a senso chu ₹6,87,854 a ni. Financial Memorandum kan en chuan,

a existing figure leh tun a kan rawn sawi kha a in ang lo maithei a. Heihi cabinet memo siam hunlai leh tuna family pensioner leh pensioner la zat a inan loh vang a ni.

Pu Speaker, he bill-in a tum ber chu - family pension leh pension tih pun a ni a, a danglamna chu hetiang hi a ni - Section 3 (sub-section 1) ah chuan, he pension hi a latu dam chhunga pek tur a ni a, a basic chu ₹20,000/- a ni a, kum tin 5% a pungin, cheng ₹35,000/- thlengin a pung thei a ni. He Amendment hmang hian pensioin basic hi cheng ₹40,000/- ah tihpun a ni ang a, a pun dan hi kum tin 5% a ni ang a, cheng ₹70,000/- thleng a pung thei ang. Tin, hei bakah hian medical assistance thla tin cheng ₹2,000/- a tel bawk dawn a ni. Section 3 (sub-section 2) hnuai a clause A, B, C, D leh E te hi a tangkai tawh loh avangin paih tur an ni a. Section 3(A) hnuai a family pension hi tun dinhmunah a basic cheng ₹10,000/- a ni a, kum tin a 5% a pungin, ₹20,000/- thleng a pung thei a. He amendment hmang hian pension basic cheng ₹20,000/- ah tihpun a ni ang a. A pun dan hi kum tin 5% tho niin, ₹35000 kha a pung thei tam ber a ni dawn a ni. Chuti chuan, heng Defunct Pawi-Lakher Regional Council te hi hman lai an chang zo ta a, a body pawh hi a awm tawh lo a. Amaherawhchu, mi tlemte la dama te pension chu tihpunna a ni a. He House hian hriatthiama, ka bill rawn putluh hi min pawmpui turin ka ngen a ni. Ka lawm e, Pu Speaker.

*(Speech not corrected.)*

**SPEAKER** : A lawmawm e. Minister zahawm takin a bill chungchanga sawi turte sawiin, a putluh chhan te min hrilh tawh a. Kan sawi ho ang a, member pakhatin minute eng zat nge kan tih ang? Aw, kan senior member, Dr. K. Beichhua ilo sawm ang.

**DR. K. BEICHHUA:** Pu Speaker, he kan bill rawn lûta hi a ropui hlein ka hria a. Vawiinah hian he bill hi Zoram puma lo ngaithlatute pawhin âwm an tih ka ring a, an lawmpui hle pawh ka ring a ni.

Vawiina he benefit changtu tur te hi mihring lama ngaihtuah chuan dam rei tur tumah anni tawh lova, an lawmpuiawm hlein ka hria. He bill hi a ða a; kan Minister pawh hetiang rilru put nachang a lo hria hi ropui ka ti a, malsâwmna dawng tlâk pawh a niin ka hria. Chuvang chuan, ‘sawihole lo hian kan pawm tlâng thei mai lawm ni?’ tiin, sawihole loh kha ka rawn rawt a ni e, Pu Speaker.

**SPEAKER** : A ða kan ti mai em? Pu C. Ngunlianchunga ilo sawm leh ang.

**PU C. NGUNLIANCHUNGA:** Pu Speaker, a bill chungchang sawi ka tum lova, lawmthu sawina zawk a ni a. Vawiinah hian “Defunct Pawi-Lakher Regional Council” te chungchangah hian lawmthu sawi a ðul vein ka hria a, Pawi-Lakher Regional Council area a awm te kan nihna atang pawhin.

Tin, kan mi-hmasa, kan upa te an ni a. Vawiina la dama hi kum 80 chuang vek an ni tawh ang a. A defunct pheichu Pawi-Lakher Regional Council-ah chuan pali chauh an awm tawh a. Chu pawh chu biak hleihtheih hi an ni tawh lova. Mahse, an hlawh pung tur hi an nghakhlel a, ‘an lawm hle dâwn a ni’ tih hi, vawiinah he House-a pawh hian an aiawhin lâwmthu sawi ðulin ka hria a.

Pu Speaker, hetiangka kan mi-hmasa te, kan ram leh kan hnam tâna an theihna leh an chakna zawng zawng lo hlântute duhsak lêt nachang kan hria hi a lawmawm ka ti a. Hmalam zelah

pawh helaia rorêlna hi khawvêl awm chhung chuan a la kal dâwn a ni a. Chutih hunah chuan kan hotu hmasate, kan ram tâna an thiamna zawng zawng, sorkar hna pawh ngaihtuah lova ram leh hnam tâna lo inpete vawiinni ah chau tawh takin an awm a. Chung mite duhsakna thinlung chu he House pawh hian nakin zelah pawh hria sela. Aia upate leh Upa te zahna hi a Pathian thu bawka a ni.

Vawiinah hian a bill neitu, kan Parliamentary affairs changtu, Pu Vanlalhlana, a bik tak pawhin malsâwmna pawh a dawng zêlin ka ring, hmalam hunah. Hetianga upate chawimawi nachâng leh duhsakna châng hria hi a ropui ka ti a. Vawiinah hian he bill neitu leh he sorkar chungah pawh hian Defunct Pawi-Lakher Regional Council member la damate leh family pension la mêkte aiawh pawhin lâwmthu ka sawi a ni e. Pu Speaker, ka lawm e.

**SPEAKER** : A lawmawm e. Kan Minister hi; Ni e, malsâwmna dawng mawlh rawh se. Tunah member zahawm tak Dr. Lorrain Lalpekliaana Chinzah ilo sawm ang.

**DR. LORRAIN LALPEKLIANA CHINZAH:** Pu Speaker, ka lawm e. Vawiinnia “The Mizoram (Pension for Members of the Defunct Mizo District Council and of the Defunct Pawi-Lakher Regional Council) (Amendment) Bill, 2025”, kan Minister Dr. Vanlalhlana’n vawiina he House zahawm taka a rawn pulût hi lawmawm ka ti a. A bill body leh a chhunga thu awmte chu nichin khan an sawi tawh a, sawi ka tum lo a. Ka hmaa member zahawm tak tak lo dingte angin, vawiin ni hian lâwmthu sawi a ngaiin ka hria a.

A bik takin District Council area mipuite aiawh pawhin lâwmthu ka sawi a. Kan Sorkar hian District Council area min ngaih pawimawh zia a tilang chiang hle a, a thlamuan thlâk hle bawkin ka hria a ni. Tin, kan sorkar tirh khan VC te hlawh min tihpun sak tawh a, vawiinniah hetiang a kan Defunct Mizo District Council te, Pawi-Lakher Regional Council Family Pension leh kan ex-VC-te pension min tihpun sak leh hi thinlung takin lâwmthu ka sawi a. He kan Sorkar hian Autonomous District Council area-a mipuite hi min hmangaih a, min lainat a, min enkawl zêl dâwn a ni, tih a lang chiang hle a, a thlamuanthlâk hlein ka hria a; lawmthu ka sawi a ni. Tichuan, he bill hi ‘pass ngei ni se’ tiin, ka support a ni e. Ka lawm e.  
(*Speech not corrected.*)

**SPEAKER** : A lawmawm e. Kan member zahawm tak takte sawi kha, lâwmthu sawina lam hlir a ni mai a. Tikhan, kan Minister hi windup-a, pass rawn dil nghal turin ilo sâwm ang.

**PU VANLALHLANA, MINISTER:** Ka lawm e, Pu Speaker. Ka bill hi min pass-pui loh ka hlau khawp a. Amaherawhchu, member ten min thlawp a, min support vek tih ka hria a, ka lawm khawp mai a. Lawmthu te kha min han hrilh a, ka lawm em em mai a. Malsâwmna te kha ka dawngin ka hria a. Tin, a tâwpkhâwkah kan lawm tak tak a nih chuan, kan lawmthu sawina tur chu kan House Leader hi a ni a. Kan House Leader ngaihtuah chhuah vek a ni a, keini chu a hmanrua kan ni mai a.

Tichuan, “The Mizoram (Pension for Members of the Defunct Mizo District Council and of the Defunct Pawi-Lakher Regional Council) (Amendment) Bill, 2025” hi he House zahawm tak hian min pass-pui turin ka ngen e.

(*Speech not corrected.*)

**SPEAKER** : Aw le, kan Minister zahawm takin “The Mizoram (Pension for

Members of the Defunct Mizo District Council and of the Defunct Pawi-Lakher Regional Council) (Amendment) Bill, 2025” chu House pass-pui turin a rawn dil ta a. Tunah kan buk ang a.

Pass remti apiangin, “remti” ti ula. Rem ti lo kan awm chuan, “remti lo” i ti ang u. (*House-in pass a remti a*) A lawmawm e.

Aw le, “The Mizoram (Pension for Members of the Defunct Mizo District Council and of the Defunct Pawi-Lakher Regional Council) (Amendment) Bill, 2025” chu he House hian lungrual takin a pass ta a ni. (**Pu Vanlalhlana, Minister:** Ka lawm e.)

Aw le, vawiina kan business chu kan zo ta a. Naktuk, March Ni 6.03.2025 (10:30 AM)-ah kan thukhawm leh dawn nia.

*Sitting is adjourned. (12:26 PM)*